

四庫全書

集部

欽定四庫全書

震澤集卷二十六

明 王鏊 撰

墓表

知永年縣致仕尤君墓表

孟子曰人有不為也而後可以有為予觀公厚平居恂恂非禮弗踐呐呐然言不出諸口至其居官所至輒聞年未至一旦毅然去之世所謂勇者或未能焉於予可不謂賢乎予以是知孟子之言不誣也君諱淳公厚字

尤之先自汴扈宋來家於蘇三傳為良器仕宋提刑司
點檢曾祖諱義皇湖廣布政司經歷祖安禮貴州布政
司左叅政考忠君以景泰癸酉占南畿鄉試會試名在
乙榜授浙之平陽縣學教諭以憂去改任濟之霑化考
最擢知廣信之鉛山又以憂去改知廣平之永年在平
陽以身為教隆冬盛暑冠服坐堂上召諸生講授親為
筆削經義夜則巡行各舍聞書聲或見燈燭光則召加
獎勞惰者斥之於是諸生奮勵人才輩興平陽法食浙

鹽而民資鬬鹽以生不禁則戾法禁之則生亂君於是
濶畧苛峻視鹽多寡令輸粟於官為凶歲備又請漕他
郡粟以實倉庾於是官儲充民用足歲旱出禱三日雨
闔縣霑足而隣境旱如故民歌謠之永年民無宿倚值
水旱輒携妻子去其鄉所遺田稅則里甲代輸故去住
俱困君榜招歸之約蠲其力役若干年禁里胥不得侵
牟流者復歸不歸者計其田分隸土著民兩便之年五
十有七慨然曰吾其歸哉遂移病不治事當道不許再

疏於朝乃得可歸吳闔門自守居守者莫或睹其面年七十有八得疾則却藥不御盥櫛賦詩而逝實弘治己未七月日也以庚申正月日葬吳縣薦福山之原配鄭氏子男四察樸樾楠樾鄉貢進士孫八人君色溫氣莊不為矯詐巉絕之行取予進退之際尤不苟雖致政歸猶為學者指授經義婚喪冠祭必依古昔於乎其可謂篤行君子矣乎而世莫之知也予少辱公知且知公為深故為碣于墓上以示鄉之人

趙處士墓表

吳有奇士趙姓諱同魯字與哲年八十有一弘治十六年九月九日卒某年月日葬長洲縣趙墓先塋子表其墓曰宋熙陵第八子恭肅王元儼之後有南陽侯仲曠與其子武節大夫處州兵馬鈐轄士翮隨宋南渡家于睦武節之子義郎不玷監浦江稅因家浦江元季有諱良仁者朱彥修高第弟子所著有天人交氣圖張士誠召之始來居長洲之金莊良仁生友泰友泰生季敕季

敕生處士自元至今趙氏為庶而業儒攻文不衰處士
偉軀幹志氣高邁自六經諸子至天文地理黃帝岐伯
神仙養生之說靡不涉獵為文下筆數千言滔滔莫禦
身居田里而喜論當世事見人之屈抑與民間利害時
政缺失憤然若迫於身有裘巡檢者誣民為盜處士諭
之百方不聽乃曰若解盜將安之于縣于府于院我必
隨之裘乃止有王御史者理軍籍吳下鍛鍊齊民以足
其數處士爭之曰軍以衛民也今誣民為軍軍足民亡

何益王為霽威每遇饑歲則預陳拯濟方於郡邑大夫
辛丑大饑以郡邑無足語者乃為書詣金陵上巡撫三
原王公大要言宋元時蘇郡歲入苗為斛者止三十四
萬九千至國朝乃至二百六十二萬五千九百地昔之
地也何加多若是況今年積雨為害吳幾為沼而徵科
不止民其若之何王公讀之甚賞其文而無意於蠲稅
書至再上三上不得已許減稅銀若干且欲薦于上亦
不果近歲論東南水患起於常熟之白茆港開白茆則

水患衰堤崑山之沙湖則盜賊息而處士已言於數十年之前矣於乎處士固未嘗有一命之寄也論及世事感激奮發使其食君之祿立乎人之朝其所建白豈止是乎尚肯脂韋突梯觀望上下若世之患得患失者乎惜乎其不遇也吾故表之以告夫有位者

錢隱君墓表

君諱腴字時用年六十有八病且殆則命遷卧于正寢戒婦女勿得跡左右治喪不得用浮屠人謂君能以禮

正終焉夫所謂正終者非必曰終之以禮也終而以禮則所存將無非禮矣此聖賢之所慎也此隱君之行所以為可表也錢氏相傳出吳越武肅王鏐宋時有端問者以寶文閣學士知平江因家長洲之漕湖君生博物洽聞敦行孝友景泰中歲饑而甘旨之奉日腆考友竹春秋高矣不知歲之歉也侍繼母朱疾日以溫言慰藉朱安之不知疾之在其體也伯兄時澤卒字其孤有加事寡嫂如事兄與室人陸氏相待如賓焉君為學特長

於史尤喜為詩所交多一時聞人邪妄之說未嘗出諸
口客有談鬼神幽怪者則正色曰世豈無明者可言長
子賢授以詩次子貴授以經學貴占應天戊午鄉試知
名於時君晚居一室扁曰勤軒蓋以學自勵也予觀近
世之學率以取科名科名既得則曰吾無事於此矣君
於學非有所求也至老而不厭於禮也瀕死而弗忘可
不謂賢乎予故為表于其墓上君卒以弘治甲子三月
十有八日其葬以十一月十六日

大理寺副李君墓表

天下之所共是吾獨得不是雖然于心有不安焉亦不得而是也天下之所共非吾獨得不非雖然于心有不安焉亦不得而非也心之所安者何安于理而已矣理有愾於衆之所同而發於一人之獨見天下後世翕然從之者有之矣又可謂今之世無其人耶雖其所至不能無高下淺深要亦自信其心而非苟然者若吾茂卿者可不謂難乎茂卿諱承芳李姓世為湖廣嘉魚人舉

進士官大理寺評事三年進右寺副君負高志在大理不甚事事獨以講學明道為務敢為危言激論嘗謂當今壞天下者莫如學校科舉甚者儒先註疏欲一切廢棄抹撤直探孔子孟軻之奧聞者駭其詞莫察其意羣咻衆訕指以為狂為惑而茂卿傲然不顧不惑不沮也久之遂謝病去與其弟世卿講道于黃公山疏食屢空兄弟相顧自得也若君非所謂負獨知之見者耶能自信其心卓然自立不顧流俗之非笑者耶求合乎義不

求合乎人求信于後不求信于今者耶君歸八年弘治十六年五月卒某年月日葬蒲圻烏石湖之旁世卿少亦同舉于鄉後徒步萬里從白沙陳先生游不復舉進士兄弟之間自相師友云至是世卿命其徒蕭生自楚之燕自燕之吳求予文碣諸墓既又遣其二子教整自楚來速於戲君之自立高矣奇矣予望之邈然莫能窺其所至又安以予文為雖然後千百年復有李茂卿者出焉將必能知之故表

貞孝先生墓表

貞孝先生吳氏諱凱字相虞卒葬崑山之興賢里且四十年鄉之父老皆曰先生仕不遂而行甚高謀所以易名者初先生在娠而派太安人銜哀茹辛且撫且教卒以有立及太安人春秋高懇疏乞歸養遂不復仕因相與謚曰貞孝而祀于學之鄉賢祠於是子愈歷官至河南叅政亦且致仕矣來言于鰲曰先公義行載于郡志祀於學宮傳於鄉士大夫之口而隧首之文猶闕其不

孝之責乎非公則誰屬焉按志先生生而穎異其少也里胥役之不受功而獨自奮於學間言於縣令令異之問以經義響應無窮立免其役而命為邑庠弟子貢時修永樂大典以工書被選還以貢上中順天府鄉試宣德五年授刑部廣東司主事既而改行在雲南司又改禮部主客司遂歸優游林下三十餘年成化七年七月十四日卒葬以十月二十八日壽八十有五先生風儀高朗操守堅定曹州李公以都御史巡邊上奏曰崑山

吳某抱才居散地宜不次召用不報其巡撫江南諸子
出見撫之曰若父治獄陰德在人固宜有後乎葉文莊
公最慎許可至銘先生曰偉人也嘗言鄉里仕宦當以
公為法其重之如此先生世家吳之崑山祖諱才不仕
考公式贈行在刑部主事先生娶沈氏繼陳氏子三恩
承事郎次德季愈即叅政孫男六曾孫男五初先生在
刑部易上劇盜二人一瘦死一病且殆而誣引者六人
公念二盜死六人者終無以自脫乃哺而療之久之果

獲真盜六人得釋此曹州所謂陰德者也銘曰

噫嘻先生抱行子子少試而歸弗緇弗諧于時而
契于義列祀易名惟後之礪

漢陽府推官致仕劉府君墓表

吏而廉也其政循循則民之所蒙有不勝其惠者吏而
貪也其政苛苛則民之所蒙有不勝其害者是故人情
莫不愛廉而惡貪旌廉而黜貪而世之貪者何其多廉
何其少也廉吏蓋自古艱之而於今為甚故予於漢陽

推官劉君用涵之卒特表之以為世勸君諱海用涵字少為郡諸生則已小心抑畏動循矩矱與其弟潮咸篤志力學學皆精思深造輩類推服舉於鄉數不利以貢入太學成化戊子始占南畿鄉薦試禮部復不利以銓次授湖廣漢陽府推官君性固畏慎及有官益以公勤清白自勵漢陽凡歲時令節屬縣輒餽儀物以為禮公府日用百須亦皆縣屬斂於民以供其來已久君一切峻絕公衙屋壞不忍煩民自以俸資葺之嘗督運至陝

先時督運者因而侵牟復稱貸以取於民君獨歸其贏
六百金於官事仍克濟有惡少武斷為民厲上官欲生
之君執不可乃賂以金玉器君盡以其器置之官庫竟
按於法人甚快之按察使楊繼宗以風節聞天下君候
之楊曰若非不愛錢劉推官乎褒獎備至及以母喪去
官服除遂不肯起居吳日闔門卻掃人罕覲其面秣太
守庭揖知郡日其族兄堪與書曰郡中有趙清獻亦嘗
見之否乎堪蓋知漢川知君為深也劉之先有仕宋為

黃州統領南渡時自汴徙建康統領生和甫元平江路
推茶提領始家於吳提領生長鄉長卿生德讓皇汴縣
教諭汴縣生中書舍人孟功中書生宗明君之考也吳
下宦家簪纓世不絕者獨稱劉氏君娶欽氏子男三來
隱槩女二來有學行而蚤死君哭之慟不數日亦卒正
德辛未五月廿六日也年七十有四以明年十二月二
日葬郡城西武丘之先塋予為之表曰廡吏漢陽推官
劉君之墓

華封君墓表

維華氏系出南齊孝子寶至南宋時自汴還家無錫其
後遷於隆亭衍於堠陽望於鵞湖而今益振於塗林封
君所徙也封君諱莊字守莊考諱宗瞻妣鄒氏生子五
人封君最季其所出曰朱氏微也故封君自幼行動不
敢與諸兄齒別居塗林屋廬弊陋田園毀頓於鵞湖諸
宗不敢望焉而旦夕省二親益以勤諸兄或陵之終不
較唯以力田勤家為務善自節縮衣食為儉約家以日

饒民有負其租不時納益緩之或值水旱盡捐之民戴其惠輸之無後者遣其子景從名師游景力學有聞遂擢進士選入翰林授戶科給事中未幾詔以景官官其父母楊氏封孺人景以慙直忤時出為南太僕簿後稍遷知韶州府封君每戒以潔已愛民景修政有聞擢貴州布政司左叅政初楊孺人有賢行與封君同心起家卒時年八十二後三月封君卒年八十三實正德辛未十一月九日子男二曷義官次即景女二孫男七球琳

瓚珉琢環瑄女二曾孫男四玄祐玄慶玄壽玄祚女一
以卒之明年壬申九月十五日合葬塗林之西原於戲
封君奮自孤孽起家埒於素封子致位三品夫婦身被
褒榮偕登耄耄孫曾滿前備享福履天之報施於人何
如也人欲憑其勢轢其宗兼其有者何也予故表諸墓
以眎邑之人

樂丘阡表

無錫鄒君孚伯卒二子承式謀卜吉壤久之未得也忽

兄弟聚謀曰於此有園焉去吾第不百步而近昔吾祖林泉翁嘗曰樂哉斯丘將建書院以祀始祖忠公不果吾父亦曰樂哉斯丘闢而廣之鑿池為山經度書院亦未果夫生之所營死之所安也吾祖樂於是吾父樂於是又將奚之謀者曰然卜者曰吉乃因其地易其向山增而高池濬而廣山之下為阡域前為饗祀之堂左為書院以祀忠公列樹碑表松檜鬱然成林歲時烝嘗擷新網鱸於是乎在或題之曰樂丘之阡而屬余紀其事

余聞之禮易墓非古也昔公叔文子有樂於瑕丘蘧伯
玉非之國子高曰葬者藏也欲人之不得見也反壤樹
之哉成子高曰吾死則擇不食之地而葬焉而崇之而
飾之何居古之祭者漸而之遠其祭益稀故大夫士於
祫及其高祖而始之是隆何居客有釋之者曰古之葬
者畧矣後世聖人特嚴慎終之禮周官冢人用爵等為
丘封之度與其樹數以遺後世子孫之識非以為觀美
也孔子於防封之崇四尺而其葬也周披殷崇夏旒備

焉得之為有財鄒孟子猶用之今其獨不然乎顏子曰
去國則哭於墓而後行反則展墓而入自漢以來人情
尤重墓祭人情所安禮雖未有可以義起也德厚者流
先若忠公非歟鄉先生歿則祭於社蓋邦人所同也邦
人猶祀之況其子若孫而曰不可乎余起而謝曰有是
哉乃知鄒氏之阡仁人孝子之所不廢也孚伯諱觀別
號顯齋其行歷見謝少傅邵尚書所撰碑文

誥封淑人劉氏墓表

淑人劉氏諱安貞世家金陵祖懋禮部祠祭郎中父俊
中書舍人母韓氏為故都御史襄毅公之女弟生淑人
甫三歲而中舍君即世母子瑩瑩無依襄毅公因挈以
歸撫為己子淑人幼莫之知也至六歲忽問其母父今
安在母始吐實曰汝父死久矣即悲號啜泣幾不欲生
稍長肖父像於室中旦暮上食又以父墓遠方衣不綺
食不肉者十年讀孝經諸書頗涉大義時襄毅公鎮兩
廣威名重海內嘗語人曰吾有一女當得佳婿不以與

凡子時無敢委禽焉者今右都御史顧君逢源時方以明經領鄉薦而喪其室媒者曰若是何如襄毅公曰可矣吾固素器之他日名位畧與吾等淑人入門人以為襄毅公之子也曾不以貴驕人事其舅教授府君姑淑人尹能盡婦道後公舉進士第歷刑部主事員外郎郎中湖廣按察副使河南按察使布政使至右副都御史巡撫雲南所至焯著聲蹟初封安人進宜人又進淑人命服在躬儉約不改于初乙亥九月十四日淑人以疾

卒丁丑三月三日葬某處春秋六十有四女二壻湯倫
張希范公無子以兄之子椿後娶陸氏今太子太保吏
部尚書公之女淑人幼而孤能不忘其所自出相其夫
以功名顯於時累受封號饗有多福四十餘年不矜不
怠如是亦可以為賢矣余故表其墓以示其後人

陳封君墓表

陳氏世墓胥山之青銅塢正德丁丑正月戊寅孤霽等
奉其先封君文林郎編修之柩合妣先孺人徐之葬去

先塋東南二百武封君諱興字朝庸其先扈宋南渡至蘇之吳苑鄉家焉歷元世以貧雄而中葉稍微及封君始復起其家吳人多逐什一之利君獨課僮僕力耕稼久之收入滋多開闢浸廣腴田沃壤彌跨湖堧又積書延師教子及見中子霽登甲科入翰林授編修歷贊善南京翰林院學士君亦饗有封號鄉人侈其盛吾於是知君有締造之勤予嘗過其家見其棟宇聯延而無丹雘之飾池館清幽而無聲妓之奉入其內鰥居一室傍

無媵侍歲祲輒出穀賑濟吾於是知君有施舍之分初
霽在內館邂逅逆瑾瑾方持詭辨以中傷人無敢與忤
霽獨正議折之不少屈瑾銜之未發也及竊政遂勒停
家居意猶未慊數遭邏卒至吳仇家希指誣奏事下御
史即訊舉家憂惶君獨自若會瑾敗事得已君素善飲
嘗持杯酒語人曰吾遭逆瑾之禍而不隕獲者非獨中
有主也亦有賴於是物焉吾於是知君有堅定之力夫
其締造若是取舍若是堅定若是足以表於墓矣封

君以正德甲戌九月癸未卒春秋七十有二徐亦天平
世家孺人以勤儉佐封君造家封君素嚴重每從容諷
以長厚訓諸子以忠孝誠實先封君十年卒子男五震
義官次即霽次雲迪功郎次雷庠生次霍出贅陸氏孫
男七女三曾孫男一女二

大厓李先生墓表

楚之嘉魚有兩李先生伯承芳字茂鄉人稱東嶠先生
仲承箕字世鄉人稱大厓先生二人皆清修苦節好古

力行鬱鬱抱奇氣不屑與世俛仰學皆不治章句必欲
直探孔孟遺旨成化間為庠生已厭科舉之學所司迫
蹙不得已就試歲丙午同占湖藩鄉書庚戌茂卿登進
士授官大理世卿不肯會試時五嶺之南有陳公甫者
號白沙先生以道學名重天下白沙之學不立文字教
人端坐澄心優游停涵久之渣滓消融神明內朗其學
號簡易直捷一時學者翕然趨向然亦或訾且議之大
厓心獨喜其說往見白沙大喜曰吾與子神交久矣自

嘉魚至新會涉江浮海水陸幾萬里君往見者四白沙
與之登臨弔古賦詩染翰投壺飲酒終不及為學之方
久之世卿曰箕得之矣凡學以言傳非真傳也其有目
擊而道存者乎遂歸初世卿讀書山中作亭瞰水扁曰
洗耳固已超然有混濁寰宇之意及歸自白沙日端坐
一室洗滌身心不涉階級徑造本真或勸之著述曰近
世箋註繁蕪郢書燕說鼎沸絲枋方欲一剷去之而更
推波助瀾耶顧猶喜吟咏客至相與劇飲賦詩醉起書

之割草濡墨斜斜整整無不如意及為文章刮濯陳垢
無起無止莫可端倪如山川出雲雷雨交至倏然雨霽
天日清朗亦可謂奇偉傑特者矣久之茂卿自大理得
謝歸二人日聚黃公之臺更倡迭酬伯仲之間自相師
友家徒壁立罄縣家人告不足二人相視而笑曰吾道
非耶壬戌五月茂卿卒己丑二月二十日君亦無疾而
終春秋五十有四天下惜其學之不及顯也李之先自
江西武寧來居嘉魚宋慶厯間有宗儀宗儒開義學於

湖西之濱曾祖煥鹽課大使祖善珙縣學教諭考阜封
大理評事配任氏亦甘貧苦節子男六教嚴整虔改放
整鄉貢進士女一歸鄉進士胡堯愷孫男八以正德丁
卯正月八日祔葬何公崙之原昔茂卿之葬君命教整
自楚來吳屬予表其墓及是整與放復來請豈以余嘗
窺其造詣之一二耶且二子遠來之意不可虛辱則為
之表於墓曰人或曰白沙之學不事著述大厓之見於
文與詩抑何多耶豈以是為非著述乎余曰道去言耶

去行耶聞昔之君子有終日言而未嘗言者余何足以
知之大厓之銘白沙曰虛以立本動而能神凝而涵之
天飛淵淪於乎其殆以自見也夫其殆以自見也夫

周煦菴墓表

周之先本金陵君遠祖湛宋戎州通守亢國子學正泰
當宋季蒙古兵入臨安所在奔潰泰糾衆抗之不克而
志益奮名其子曰思岳思李思文謂武穆忠節信國也
其矯厲風節如此思文於君為五世祖與思李始徙家

晉陵思文既又徙居無錫君大父諱惟慶考濟廣所謂月牕者也月牕始以醫名成化中徵至京師京師醫得時名者林立月牕後至一旦殷然名出其上然他醫皆得官尚藥奉御月牕無近侍推挽年老告歸猶尚布衣也而名益高初月牕自以醫非家傳則必由師傳乃從甘露金孟昭學又徧參諸家凡瘍瘡帶下顛頤專門者輒師之故能兼衆長而君亦兼得父之所長君諱數字時榮別號煦菴初習進士業經史皆涉大義既而改業

醫患近世醫家止於局方逡觀賸探自炎黃岐雷越人
淳于長沙河間諸書無不披閱卒會於東垣丹溪氏於
藥性必辨其州土時節物宜炮炙咀咬必盡其材性以
之治病十愈八九遠近求治者舟楫騎從恒滿戶外君
應之無倦色愠語又不責其報人以為有月牕之風關
西一戎卒過吳道病病且侵君舍之郊野設牀褥饘粥
藥餌時一往診之以增減其藥半歲許安仍資道里費
以歸甚似羅大無之治病僧山陰王司寇巡撫鄖陽時

夫人久臥病諸醫罔效君自武當歸過鄖謁君治夫人見其藥品精潔鮮香蹶然起曰吾病已去二三不數劑遂愈又似錢仲陽之療不得瞑者其他尚多奇效不書書其最者君為人慈孝恭讓歲時祀先必以禮撫孤睦族延師賓接游士至園池亭館尊彝圖史皆脩然有高尚意一時名人韻士樂與之游及病却藥弗御曰先君子有言矣病不能死生藥不能生死正德丙子二月六日卒春秋七十有四己卯二月甲申葬邑九里之先塋

配華氏子駭能傳家學孫興岐其墓也余為表其墓曰
是為名醫周煦菴之墓來者尚勿毀也

中議大夫江西知南安府張公墓表

公諱弼字汝弼讀書不治章句獨慕古奇節偉行慨然
思與之齊視世之齷齪無足動其意而世亦莫之用也
其瓌奇卓犖之氣無所洩則時發之於文發之於詩發
之於草書而發之事業殆不能十之一二而亦足以名
世矣公少為弟子員已博覽無不觀既長始中南畿鄉

薦成化丙戌登進士授兵部武選主事改武庫進車駕
員外郎出守南安六年以病乞歸卒公天分高朗出語
不凡其發於文則病近世萎靡腐爛之習痛掃去之自
立一家言顧嘗自許得古人矩度而世莫之知也為詩
每寓感時憂國抑邪與正之意翰林修撰羅應奎上疏
劾時宰得貶人無敢送者公作詩贈之慷慨激烈膾炙
人口送章德懋黃仲昭莊孔易外調之作警句往往為
人傳誦而亦不免忌者之嫉也其草書尤多自得酒酣

興發頃刻數十紙疾如風雨矯如龍蛟歌如墮石瘦如
枯藤狂書醉墨流落人間雖海外之國皆購求其跡世
以為顛張復出也其在南安拆毀淫祠以百數表章先
賢作唐張文獻祠宋李丞相亭立鐵漢樓而人仰凜然
不改之操作吟風弄月臺而人挹悠然自得之趣鑿梅
嶺之嵌巖行者願出於其途梁橫浦之崩湍濟者無病
涉定中途博換之例而南雄南安之爭端永息及去之
日民為生祠以祀其政事有如此者使公得竟其施其

樹立豈止是哉公仕京師時方尚交謁每正歲投刺紛然人馬交道公一切謝絕有嘉召必赴嘗自言曰嬾於投謁勤於赴宴後府護月邏人行不如法人皆辟易公舉牙牌示之曰若欲知我乎我武庫張某也又數以直言忤司馬當道者積不能堪故出之南安而公自得也曰吾學可以試矣公以成化丁未六月某日卒其年冬十一月廿五日葬郡城北之鳳凰山安人王氏有賢行子男六弘正弘宜弘至弘圭弘玉弘金女二孫男四弘

宜以進士官至副使弘至以進士官戶科都給事中至是弘宜亦已卒弘至與弟叔拾遺文得若干卷刻之又求子表其墓於乎後世有欲知公者尚考於茲文

封奉直大夫禮部員外郎吳府君墓表

宜興有逸人焉氏吳綸諱大本字風神散朗操履修潔
皜然自踈濯於世之滋垢非其人雖貴弗與也非其義
雖貧弗取也非公事未嘗一入城府值好風日或雨新
霽肩輿行溪山間蒼鹿一白鶴一夾輿馴繞不驚不逸

鄉人遙望之輒曰吳隱君來也扁舟往來吳越間必載
鶴鹿自隨至焚林窮壑修篁灌木輒憇終日相羊吟哦
不令主人知或知之輒奮絕驚去終不言姓名人亦不
知其為誰人曰其古韓伯休之流耶創別墅二於溪山
間南曰樵隱西曰漁樂逍遙乎其間自號心遠居士意
以靖節自擬也偏嗜茗飲其出必陽羨顧渚非其地者
輒能辨之其掇之必晴藏之必溫烹之必法有茶經所
不載其爐竈融禹灰承炭槌火筴之屬亦皆精絕古雅

甚自貴重坐客四五人少許沫餽紛馥三四啜已罄
必啜者有餘思始復進終亦不令飫也人又曰其古陸
鴻漸之流耶喜作書雖老矣得書法名蹟必日臨數過
其書往往為鄉人取去藏之間閱古方書製藥餌為人
治療亦多奇效家產不踰中人至義事爭先為之歲饑
富家多閉糴以牟利君獨開廩肆糴以賑饑或稱貸數
負之又數給之不吝人犯之亦不校邑有蜀山蘇文忠
公嘗居焉君與沈司空輩拓地築室春秋饗祀至於今

故太僕少卿李貞伯有卜居陽羨之意君分田宅招之
至蘇必過沈石田流連浹旬乃去餘無所詣子仕登甲
成進士官戶部主事正德丁丑得封如仕官仕進禮部
員外郎又以詔例加封命下而卒嘉靖壬午十月九日
也春秋八十有三明年月日葬某山之原君晚年病忘
若宋陽里華子者一旦忽爽然悟平生履歷了了臨終
區畫後事細碎不遺已乃瞑目余昔過宜興與君邂逅
荆溪間同余游善卷還過其家余歸吳貽子茶爐茶竈

已又貽馴鹿一豈以余同隱逸之志耶君雖有封號之榮而其履歷風致則古隱君子之流也故余撮其隱行以表其墓上後之過者其以為隱耶其亦吏隱之間也

崇明醫學訓科杜府君令人吳氏墓表

正德庚午五月十六日崇明醫學訓科恒菴杜府君卒
葬吳縣太平鄉魏珠山之先塋春秋八十有二又六年
乙亥十二月二十三日配令人吳氏卒祔府君兆春秋
八十有八府君三子璧琮皆先卒其庶子璠力舉喪事

且涉太湖踵余門拜且泣曰先訓科之葬既辱執事銘
茲令人葬仍冀哀而表之庶名永長存不肖孤有所覆
蓋而子孫百世所共嘉戴敬敬以請余曰子來宜也顧
令人之生也余不及升堂瞻拜懿範於何考德而表之
余觀世之為母者莫不厚其所生非所生而撫之踰於
所生是賢也為子者莫不崇其所出非所出而崇之踰
其所出是孝也吾於是不能無言焉按狀令人諱寧字
素寧世家吳之雁蕩村其先有櫟堂先生者仕宋稱名

儒後多為顯官高祖子清元山陰令曾祖可安皇同知
鳳翔府後贈戶科給事中祖經太醫院醫士考滿以學
行隱於鄉令人幼則顯靜有禮頗涉孝經女誠諸書特
工紉製縷結之事既歸府君旋有崇明之任伯氏又以
學諭官遊彰德舅姑年高性嚴令人承顏候色卑高短
長罔有乖忤時新未及饋獻不以入口性婉嫕溫柔而
治家內外井井佛老巫祝之類不一至門細而調膈烹
飪薪樵之宜外之苞苴簞食之間咸有節適二老人安

焉不知其子之遠去也璠生四歲喪其所生令人懷抱
推燥居濕不異已生痘證危甚且潰爛不可嚮邇所親
皆欲棄之醫亦以為不治令人日夜撫摩調護已乃得
生年未六十豫治棺衾斂具及疾革璠稽顙禱於北辰
令人曰安用禱為吾年幾九十死乃為歸仍召諸孤誠
之曰吾無以遺若曹若曹各自勉旃讀書業醫無隳前
人之業葬當從薄勿事美觀為吾累也葬之日為丁丑
九月十一日壁太倉醫學典科琮郡學生季即璠女四

咸有歸孫男七山嶽崑錚鉅鋤山嘉定醫學訓科女
四曾孫男女十三璠非獨能世其醫也又能感勵奮學
以古文行義重於時璠可謂能子矣若令人亦可謂不
失所養矣吾故表諸墓以為世之法

贈監察御史陳府君配太孺人譚氏墓表

監察御史陳君察與弟檢討寰纍然衰經詣余泣曰余
先人亦嘗有志於用世也孤苦艱屯自悼其志之弗遂
又自知其年之弗永也自營葬地於虞山之陰謂察等


曰歲行至甲吾當死不及見汝之有立也吾死汝葬我必於虞山之陰若等幸有一命當以告我使我知汝之有立也及期卒吾母課不肖等益嚴學少懈則曰而忘而父之訓耶不肖輩感泣奮勵歲壬戌察忝進士承乏監察御史辛未褫亦忝進士承乏翰林檢討吾父弗及見也正德中贈吾父如察官母封太孺人可以為榮矣今吾母亦已棄養不肖輩痛吾父之不及養也吾母雖逮養而不及含斂與祔也是終天之恨也所以發幽潛

表著以見於後世少逭不孝之罪者敢以累於執事幸
許之也余聞其語而悲之為表於墓曰府君諱稷字允
才世為蘇之常熟人祖諱某考諱某號清隱府君甫成
童清隱與母尤相繼淪謝子立無倚里人侮之弗與校
且耕且讀不復事進取喜為詩工於書法閉門謝塵事
日哦詩弄翰所往還者惟縉紳逢掖高僧羽流以自娛
雖居城市而翛然有出塵之思閱載籍有得輒識其處
曰他日以示吾子二子學業之成蓋有賴焉太孺人諱

姓昆湖右族力勤儉以起家初不知字書佐府君課諸子時聞古訓至自能作書及二子咸有祿仕孺人之志存乎報國二子之志存乎色養故褰出仕察則歸養褰歸侍察乃勉出出巡滇南歸過家一宿而去嘉靖初元史館肇開移文趣褰褰不行太孺人曰汝史官也史自爾職不行何為于時察亦有巡蜀之命太孺人曰若等第行吾氣體固健在無以我為念二子行而太孺人以是年九月廿九日終於家享年七十有六府君之卒為

弘治甲寅十一月三十日春秋四十有七二子以某年
月日祔葬太孺人於府君之兆察當武宗朝屢抗疏言
時事及南狩又力諫雖忤旨不沮不撓出巡西南獨持
風裁人無敢干以私橐文學蔚有聲望二人服官久服
食居室如寒素持喪動依禮則清修苦節近世鮮倫王
子曰夫為人子者不獨養親為難而以顯親為大顯者
非爵祿之謂能自樹立不苟同於流俗使其親為賢人
之親顯之大者也若二子可謂能顯其親矣府君太孺

人可謂有子不死矣余故為表於墓上



震澤集卷二十六

欽定四庫全書

集部

震澤集卷二十七至

詳校官中書臣瞿 照

中書臣劉源溥覆勘

總校官進士臣朱 鈐

校對官中書臣李斯咏

謄錄監生臣王爾熙

欽定四庫全書

震澤集卷二十七

明 王鏊 撰

誌銘

右春坊諭德劉君墓誌銘

弘治五年八月二十日右春坊右諭德劉君景元卒於京師子榮應舉江西孺人胡氏與二孫曉暕以其喪歸江西之安成明年正月七日葬廬陵之梅華塢年五十有八劉故安成鉅族君祖東匯父丕嚴贈翰林編修母

趙氏封太孺人君諱戩景元字生穎脫超邁日記數千
言年二十一占江西鄉試會試屢不第入太學為文章
宏深瑰絕聲華振起名士景附每一下第物論稱屈主
試者每以不得君為歎年四十始與予同登乙未會試
廷試第二人及第授翰林院編修九年進侍講預修憲
廟實錄成進今官上之初即位也例遣近臣使外國時
安南吞占城侵緬甸外恭內驚衆謂非剛方才辯者不
任是行君時以侍講為正使先是使外國者多治巨艦

載重貨浮海與其國為市輟接艫銜或與陪臣賡和誇
奇角捷以為才君考地志陸道南寧逕甚無虞乃乘肩
輿從兩僮忽抵其界夷人傾駭郊迎館候視舊虔甚陪
臣拜跪立受之不與交一語至之日頒詔明日讌讌畢
遂行國主恐竦至曰一國生靈命懸天使金珠犀象餽
貽錯落一不顧王復遣人追授諸途不與語獨書其入
關詩與之曰歸裝有一南物者關神其殛諸其後安南
遣使入謝表有廷臣清白之語出使時賜麒麟服實錄

成又有白金文綺之賜君博學無不闕多識本朝典故
嫉邪守正氣豪論卓遇事直前意見捷出喜面斥人短
長旁聞縮慙君色自若尤精人倫識鑒見表洞裏分劑
參停十不失一權門勢家庭無行跡高亢特立與世寡
合而獨與予善也予出則詣君君出則詣予見則相與
劇談兩相忘而罷及病革予往省之氣奔上僅屬予為
悽惋君曰自古有不死者乎吾已後顏子矣病間復語
國事會劉文穆罷壽寧侯卒君時不能言矣忻然索筆

為詩有天留老眼待三月之句命其弟戡曰乞濟之銘
予還自南畿考試至臨清遇其喪哭之以詩於戲若君
非古所謂直諫多聞之益友乎予方賴焉振吾過策吾
昏以終吾身庶有益乎而君棄予死矣銘曰

剛吾未見聖所歎去之千載茲唯艱安成水激山孱顏
是生夫子勇且仁口持公議立詞垣別白白黑不肖賢
誰云不用用未殫直辭一吐十蚘蟠世方疾走行獨跚
辭喧得靜非所患峽峽齟齬驚髦鬣謂方耄耄胡不延

後懷遺直表茲阡

陸處士墓誌銘

處士陸姓諱俊字伯良古貌古心古衣冠治家居鄉出
詞行事世多迂之而予特愛其近古也年八十有四以
弘治五年二月十二日癸丑卒十一月甲申祔葬蔣塢
之先塋處士予叔祖行也幼特受知焉今還不及見也
為文祭之且志其墓陸氏為馬甲處士悉馬甲之害也
將疏以聞大意以北人習馬南人習船南人為馬甲太

宗權時之制耳今宜南北各復其舊便又言吳下官田
稅十民田稅一均之則國用不虧民不困又言錢久不
鑄且竭宜復五銖備一代制又言州縣官剋下宜多設
官相監制又言鹽法急盜滋多弛其禁盜將自息其書
凡數千言其草數謄易無間寒暑晝夜行坐寢飯得一
字輒起易之欣欣告人意以為必可行也始以干當道
當道若不聞已乃不問貴賤賢愚遇人輒授之又牘於
道路市肆曰庶有見而行之者積三十餘年費紙筆如

山人或信或笑或以黏壁淨几處士終不廢也予間謂
曰何為紛紛翁家所苦者馬役吾能言於官而免之處
士曰吾豈為我設哉吾以為天下也吾家固自宜役其
志公其念深其自信篤於戲使世之在位者皆有是心
國事其有隳乎吾又以悲處士之不遇也處士類寬厚
而治家甚嚴嘗曰壞人家者藏獲也故陸氏雖富有傭
無奴私鹽升合不得入戶年八十以詔恩授冠帶然家
常罕御曰吾自宜山林之服也此固世之所謂迂者乎

豈所謂古者多近於迂乎其平生精力具焉役書故特
詳焉配周氏與處士合德卒亦年八十四子男二長均
顯蚤死次均昂克世其家孫男二曰豸曰豸豸為郡庠
生銘曰

孰謂丘壑國憂是瘁飽食優游媿爾有位

靜菴處士墓誌銘

西洞庭處士徐君諱震字德重年七十則作壽藏於山
之富子岡曰吾將歸矣又八年為弘治三年九月二十

四日卒六年月日乃克葬焉徐為洞庭鉅族而家世好文處士生長湖山神清抱潔少從陳太史嗣初學詩太史亟稱之既又與其兄德彰日相劇切學益進有弔項羽廟睢陽懷古輓岳武穆諸詩傳播人口久之謝賓客歸山中日焚香垂簾雖鄰里無行跡而詩終不廢也先娶鄒氏再娶顧氏子男四淮濙濂潮孫男八數十年來詩法稍變類以雄渾沉實為高晚生初學摸擬竄竊割裂飭餽以為奇而處士日藏深山賦詩止以自娛往往

世不復知有處士矣然唐人高風絕塵其復可見乎若處士其猶近也孫縉王氏壻故予為銘銘曰

通世營營匪利伊名學追時好與世角爭洵美徐君遐騫高揭孰知我吟谿雲山月湖山崙崙湖水瀾瀾我懷其人不在於詩

封奉直大夫右春坊右諭德謝公墓誌銘

謝世家剡之臨海其先有諱長者始徙餘姚汝湖之四門四門之徙蓋當宋元之際長生明明生回一於公為

高祖曾祖諱某祖諱某世載令德厥有休問考諱瑩鯁
直自將不阿權貴為光祿署丞斥為福建布政司都事
又斥持其直終不變公諱某字某英睿夙成童丱比辭
屬對響應無窮及長藻思逸發以禮舉於鄉屢上不中
泐之士曰科目果不足以得人乎如某乃黜天順初知
嘉定縣事錢塘蔣忠舉公經明行修會御史巡按蘇州
者沮格不行或謂有關節可得則長揖去之曰如此得
仕非吾願也還舉於鄉年四十餘卒不第而其子遷德

器日開則東其經以授之曰吾已矣其爾乎成吾志也
遷發解制江第一廷試天下第一歷陞詹事府少詹事
兼翰林院侍讀學士直亮方嚴隱然有公輔之望於天
下公以子貴初封翰林院修撰進封諭德配鄒氏由恭
人進封宜人公素負經濟及受封則絕意世故日以詩
酒自適於山雲海月之間無事不入城部使者過門談
論今古某為利某為害衮衮不竭聽者常聳如其言興
除民輒稱便公瑰偉軒豁不為崖岸城府遇人輒盡或

曰無乃太簡乎因自稱簡菴老人弘治四年鄒宜人卒
詔有司治墳於縣之牛嶽喪且免而公以六年四月二
十六日卒於家壽六十三上又遣官祭以弘治七年某
月日啟塋合葬宜人龍圖閣待制忠公浩之裔純德至
行人無間言子男四長遷也次選迪遺女適上虞韓練
孫男二正丕女二曾孫男女各一唯公宜試而室祉萃
後人恩命敷賁終始哀榮可謂盛矣後祿之至方日富
而未艾也於戲則亦何必身自為之銘曰

謝始申伯厥後孔碩相安將玄派別支聯中葉或微望
於臨海餘姚來家繇公始祖儲祥系仁幾三百年其後
將昌故晦其先俟俟封君華實有煒仕我徂求舉步可
跂屢上不試天固尼之孰云尼之實將啟之紫閣言言
在帝左右啟沃敷陳維公有子孰積不施孰耕無穫錫
命追榮其報斯食其食不贏不諧其盛喆幽眎昭皇有
後命

安人姚氏壙銘

安人姚氏少師榮國恭靖公祖也尚寶少卿諱繼父也
昭信校尉蘇州衛百戶史君宗廣其歸也生永樂辛卯
弘治辛亥壽八十有二矣一日顧其子鑑曰吾老矣其
為吾治壙於某山之陰吾將從先公而休焉禮壙石有
志其即陳御醫公賢圖焉吾且欲見之公賢其子壻也
以銘屬予初少師以方外士佐太宗靖難奇謨秘畫載
在金匱配饗太宗為時宗臣不娶以繼後繼太宗賜名
也命侍東宮學仁宗即位即拜尚寶少卿少師嘗不願

其家恩數過盛故位止此安人時侍京師年十七八矣
靖難遺事尚能道之始宗廣善畫嗜飲每畫必大醉自
以為樂然安人每非之曰是乃公事耶後宗廣卒安人
持家教子率有矩度銘曰

赫赫榮公翊戴真主凌煙畫像配唐房杜翼翼符卿侍
學文華帷幄寵數擬漢陽都吳山之陽有高者墳後千
百年孰知其人符卿之子少師之孫

知將樂縣陳君墓誌銘

於戲古所謂循吏者其殆不可復見乎以吾所聞故將樂陳君其近之也予故誌其墓以告後之人初君以進士選知將樂大書廳事曰勤以補拙儉以助廉民有嚴甲者前後持吏短長吏不敢動君至則執之庾死獄中訟為頓減將樂歲漕以給莆戍莆又漕以給將樂風濤湍悍覆溺相望君校其數相埒因各留餉其境民兩便之其因事為功類此時勸課均徭役抑豪強儲蓄已乃興學校修城池驛傳倉廩道路至或捐俸為之龜山

先生墓弗不治君為闢路若干置祭田十餘畝唐汀州
刺史穆公溺死見神於邑人君為迎衣冠葬之春秋祀
不絕邑有巨峽民橋其上列屋櫛比淫雨暴漲民居且
浸橋亦危君為禱於神水立退歲大旱君禱之又立雨
邑人以為神部使者行縣睹其治曰樂邑其有賢人乎
雖隣封有事輒以屬君光澤有疑獄歷數年不能決君
至一訊立得其情比歸光澤民遮道求識其面拜於馬
首而去城沙縣也績久弗成君為物土賦庸民不知勞

使者上其績旌異之命下而君卒年四十有四君諱大經字正之姓陳氏陳世家江西之德興宋南渡始家上虞高祖某隱九峯山累辟不起曾祖倬祖敬輿通諸家書考世英通尚書史記善楷法君生祖異之曰他日必志經綸因名比長敦慎溫文初習禮已而旁通諸經以詩占荆江解試登庚戌進士娶張氏某府太守嚴之女以某月日葬上虞某處弟南京大理評事大紀來請銘

銘曰

長吏庇氓或為騰蜚豈無異政非威伊名樂人熙熙君
我父母鄰邦曰嘻我乃無有三年之政百年之思顯刻
幽宮維後之貽

湖廣按察司副使蕭君墓誌銘

蕭世家蜀之巴縣君高祖諱某洪武中司永平府獄因
家焉今為永平人祖諱本立考諱鳳君諱謙字有終由
進士授大理左寺評事進寺正擢山西按察僉事董屯
田諸務以憂去改淞江按察司副使督銀場諸務改湖

廣整飭辰沅兵備三年考績行至揚村卒弘治乙卯八月二十日也壽五十七以某月日葬某處娶李氏後君五日卒子男三淮武略將軍某副千戶漢國子生女三長適千戶解璋次鄉貢進士張秉次千戶朱陞君居官動遵三尺其在大理號能辯疑獄然求其出不求其入理屯田屬邊多務出奇應猝軍以克濟建寧時有盜張甚君躬詣其地梟其首亂者餘悉解縱遂平之鎮巡大臣以聞詔兼分巡建寧道即其地立分司鎮之大軍之

討都勻也君統番漢軍策應事平蒙璽書錙幣之錫是
役也君冒藁箐觸炎瘴遂得疾君性仁孝在官聞父母
病即哀號不事事聞喪三日行官屬有不知者姪江與
漢年相差婚娶必先江而後漢采幣之禮眎漢有加焉
間同疾眎之亦必先江而後漢漢居京乞銘於其鄰王
鏊銘曰

噫有終甫北方之傑理刑治兵所至則發仁孝溫溫吾
得諸鄰刻此銘章維以示信

恭人李氏墓誌銘

河南布政司左叅政王君名珣之妻故太子少保吏部尚書諱秉之女尚書致仕歸曹高標峻節海內仰之癸丑歲叅政君之子崇文以進士選入翰林為庶吉士今年春次子崇獻又以進士被選間嘗詢焉則皆尚書之甥也予以是知家學之淵源宅相之徵兆有不誣者久之崇文崇獻哀經泣詣予曰先恭人葬曹之水谷迄今二十有二年今以繼母恭人黃之喪將祔而先恭人墓

未有刻先恭人之卒不肖兄弟幼其遺德不及知雖然
間則聞之先外祖母聞之伯叔母而先祖贈湖州府君
嘗稱以礪諸婦矣敢次為狀以請予不得辭恭人高朗
淑慧言動有法其幼也尚書教諸子書恭人從傍聽之
即能了大義及歸王氏事湖州克孝克敬滌滌之奉捐
妝奩為之叅政在官時節饋獻踵道湖州之歿衣衾棺
槨皆恭人經紀之叅政歸無憾焉育孤睦鄰賓接內外
禮意曲盡其卒也里有孤女以母之喪喪焉至於今諸

姑伯姊有會則曰恭人之賢也或至泣下者恭人生正
統庚寅以成化乙未正月二十六日卒年止三十有六
先封孺人繼封恭人叅政子男八恭人出者四崇孺鄉
貢進士崇仁庠生崇文戶部主事崇獻庶吉士餘曰崇
儉崇讓崇有崇素恭人卒靈爽多異過祠不肅則恍若
見焉叅政為御史以事被逮曹人未之知也其主忽自
仆於地家人驚駭識之則被逮之日也豈其生而賢明
故死而有不亡者邪銘曰

在曹之陽其湫維谷誰墓於茲有拱者木冢宰其考夫
維岳伯八子宦學其儀濯濯維年不待迄於休成於赫
皇命象服是榮孰云不壽厥靈孔章納銘於幽以告不
亡

太醫院判陳君墓誌銘

陳之先自鳳陽來家於吳始祖良炳元同知太醫院事
高祖新齊郡醫學正曾祖本道世以醫學相傳吳有孟
景暘者精小兒醫本道館甥景暘所併得其傳祖彥斌

考仲和始皆專小兒醫君生七歲而孤少長發憤讀先世書有聲吳下成化中詔取名醫郡以君名上君以太孺人陸春秋高一詣院即乞歸久之太醫院言治小方脈者少復起之君至甫一月被選入御藥房旋拜御醫出入禁中調護諸王累奏奇效遂進院判今上即位以例仍為御醫三年進迪功郎入視東宮疾效加俸一級丁巳歲上章乞歸上曰如陳某者何可使去左右而請益堅上察其誠遂進院判致仕歸弘治庚申五月十三

日卒春秋六十有八君為人不事表襮或侮之卒不較
少嘗誦學喫虧詩以自警直禁垣十有四年恭慎周密
累有白金之賜其為醫究切脉理力護本原不求近效
不肯乘危射利貧者或反給之故其名籍甚而尤重於
士夫初名慶字公賢後以字行而更字公尚初娶仰氏
大理寺丞瞻之孫繼娶史氏蘇州衛百戶浩之女子三
憲寵宥皆世其業寵入御藥房亦有名京師孫男五女
一初君為壽藏於黃山之陰予預為之記比歸日經營

之未合也而君卒遂以明年月日葬焉銘曰

醫維仁術或益之疾孰唯其良乃及於國噫嘻公尚和
緩是同皇裔訖訖厥維其功黃山之原生所治止既曰
治止尚安歸止

兵部武庫郎中吳君墓誌銘

弘治己未兵部武庫司郎中吳君汝礪以病告歸吳江
行至德州卒其弟鏐扶匱歸以庚申某月日葬大興圩
之先塋來乞銘君諱鏐汝礪字為人好學攻文而尤有

詩才其為詩苦思冥搜句妥字帖喜學唐人而時出新
意與人交不立崖岸當官勤慎而無墮事是以人愛重
焉意其必將遠到也汝礪占南畿解試三試禮部不中
冢宰三原王公巡撫江南間召與語因極陳民間諸弊
傳以經史指掌畫地衮衮不休王公驚焉贈之詩期其
大用君復以詩諷公公益竒之及登進士授兵部武選
主事進員外郎又進武庫郎中武選武庫皆劇司君自
儒者好從容嘯咏而終日抑首據案鈎考簿牘意不能

無少望又質弱多病醫者不審妄投之藥遂至不起嗚呼豈亦其命然耶嘗以進士治大臣葬道聞母訃遂委事逕歸當道者難之君曰安有舍親之喪而勤人之喪者乎祖諱某考某封奉直大夫兵部武選司員外郎母李氏贈宜人娶汝氏知南安府行敏之女封宜人子一人曰重陽聘監察御史陸全卿女重陽方二歲乳乳可念全卿曰吾與乃父有言矣遂許委禽焉銘曰

孔翠之文鵬鶚之鷖才也孰賢亦維其地嗟嗟汝礪壽

復不遐有文不耀有銜不抒埋鬱陰幽噫嘻奈何

承事郎徐君墓誌銘

徐裔出金華有三奇府君者當南宋時命一子留金華
一居舒之望江一居吳邑太湖之西洞庭山洞庭有原
隰陂池田園之利徐氏世擅其富世讀書好禮而不求
仕入國朝子孫滋盛散居山中世以東南西北宅別之
君所謂南宅者也其世系詳見故陳太史嗣初所譌先
世墓文考諱震生子四人君於倫次最季而最愛於父

雖不治舉業而好學不倦作七字詩往往可誦書有楷
法兄弟既分煙君獨不忍去依其父以居終身焉父志
所未至能先意承之及父母相繼歿寢苦柩側旦夕承
事如生食必祭飲必奠朝設洗沐莫拂茵枕未嘗替於
初娶沈氏生二女子二曰縉曰紳王氏出西洞庭入國
朝未有登第者君日夜督其子學縉果登順天鄉薦山
人榮之君以弘治辛酉六月二十二日卒享年五十有
二以某月日葬金鐸之原君體貌瓌碩襟宇夷曠意其

必壽而止是縉方嚮用於時恩封有日矣而君不待於
戲傷哉縉予子壻也為之銘

昔之日俟我兮湖之麋今之日送我兮江之涯風神猶
在兮訃豈非有封不待兮可奈何嗟嗟命兮可奈何

震澤集卷二十七

欽定四庫全書

震澤集卷二十八

明 王鏊 撰

誌銘

貴州按察司副使陳公墓誌銘

弘治十七年六月二日前貴州按察副使陳公卒十月
四日辛酉葬吳山之上金原壽六十有六初公按江西
有李都御史者與民爭水利積數年無敢決者公曰吾
請決之盡以其地歸諸民李嘆之未發也久之公遷貴

州李時為吏部考察見公名曰是陳某耶即泚筆抹去之物論譁然宣慰使宋然率軍民抗疏留之不報公罷歸吳中家具蕭然至粥書自給有司援天順詔例歲給米五石日與學者講解經義有感觸輒發於詩佔畢呻吟病咯血吟猶不止竟卒君諱琦字粹之大父諱某考諱茂封奉政大夫江西按察司僉事陳之先本吳人以醫辟居京師公少占順天鄉試成化丙戌登進士授南京大理寺副歷寺正江西按察僉事貴州按察副使公

在官累辨疑獄廬陵有儒生夜過里人胡甲被殺官執胡胡自誣服公曰豈有殺人而自置於門者訊之則儒生有仇知其夜適胡也殺之胡得釋劇盜數十人為曹白晝標掠無禁公出令獲一人者賞若干縱其酋厚遇之乃得悉其巢穴掩捕立盡清戎御史大煽酷虐蔓引平民公爭之不得乃出理所分道民悉自首實御史誣執二百餘家悉縱歸農比御史去民手瓦石胥擊之而為歌謠以頌公公所至興學獎士見韋素有文行折節

下之負權勢者視之如無竟以是罷娶吳氏繼邢氏子
多年始十二女適烏程縣學生嚴統銘曰

噫嘻冷菴唯義之耽惠文客客孔允且直官誑名振孰
云我貧我貧我安講道以哦於戲逝矣傷如之何

福建布政使左叅政姜公墓誌銘

公姜姓諱昂字恒順生而端重介特不苟言笑數歲刻
礪讀書成化辛酉占應天鄉試明年登進士第出知棗
強一意愛民凡所決遣皆自以不寃門無呵卒獄無滯

因三年召試監察御史時方士李孜省得幸公率同列
疏論之命杖於午門外以親老乞改南京河南道出理
福建戎籍擢知河南府值歲大旱公至則雨隨之洛人
抃舞每晨吏白事退終日閉閣觀書鞭箠懸不用時母
夫人年八十以懷土屬疾疏乞近郡便養不許疏復再
上三上至乞降府佐或教授它日除邊遠自効乃改知
寧波寧波聞公至同官皆減去輿馬華飾俳優雜劇不
一陳於前日本入貢過郡望公迎戢六年復以母老歸

養進福建布政司左叅政不起且上疏乞終養母卒服
闋部使者奏起之而公以某年月日卒某年月日葬郡
城之官山公於取子尤不苟在官日買肉少許奉母自
食蔬菜子弟學書不得用官紙筆非歲首未嘗燕客不
受人餽貽亦未嘗餽貽於人權要請託一切報罷以是
人多不悅而亦不能毀也姜故汴人扈宋南渡家崇明
之西沙元時徙崑山之惠安鄉今為太倉州人高祖諱
仲和元海運千戶曾祖諱源祖諱疏考諱敏贈文林郎

南京河南道監察御史母曹氏封太孺人子男二長龍
中應天甲子鄉試次淮女三孫男一女二銘曰

抑抑姜侯維行之揭矚然不緇為彼玉雪皇假近郡汝
其予守色養以終萬鍾奚有東海洋洋終卧不起於戲
姜侯可謂君子

通議大夫工部右侍郎談公墓誌銘

公談姓諱倫字本彝其先有仕宋為博士博士生宗遂
宗遂自開封扈宋南渡家吳興復遷上海族日蕃大曾

祖諱季芳始以族大為懼痛自抑損散財積書人謂之癡國初諸巨族皆謫戍人始服其識祖諱節考諱景瞻皆贈通議大夫工部右侍郎公長身豐頤瑩然玉立景泰丁丑登進士觀政吏部時鹽山王忠肅為冢宰風岸孤峭意輕南士見公瞿然曰南方有此人耶因授驗封主事甫一年擢員外又擢郎中公性開朗又善承忠肅意忠肅愛之英廟每召見忠肅輒以公隨上問之忠肅以公名對曰臣老矣於聖諭恐有遺忘此郎代臣志之

且其人可信也上因欲大用之忠肅謂公年少資淺他
日用之未晚久之丁母淑人憂服闋至京則濟南尹公
為冢宰補虞衡司三載擢應天府丞鳳陽大水尹京者
不敢以聞公自署其奏是歲詔免秋糧數萬進尹應天
改順天會軍興橫索民車以千數公許以百兩不可倍
之不可再倍之又不可乃具以聞詔以百兩與之自是
軍士無敢橫進工部右侍郎筦易州薪政搜逋抉隱剗
削奸蠹歲得羨餘若干萬會南昌人李孜省以左道倖

尹公子龍被逮尹公以是去公亦隨之初公受知忠肅忠肅之病也日侍湯藥於左右忠肅臨終以公託崔尹兩亞卿兩亞卿亦自才之故公往來三家如家人父子時萬文康在內閣有憾於尹因攷省媒藥醞釀以成其獄士出尹公門及山東者盡逐之朝班為空尹公之門無敢闖焉公於尹最厚其行也又往餞之故及今上登極公道昭宣攷省伏誅謫逐者多召還而公竟不起弘治甲子某月日也年七十五年乙丑九月葬先塋之

東淑人王氏張氏祔公無子以弟之子田後初公家居
歲遣人起居尹公於山東忠肅之卒也祀之別室崔公
歿亦如之尹公亦如之蓋其篤於所事如此嗚呼公之
才識固遠到器也不幸屢為當道諸公所知或推或輓
卒以顛殞是獨何哉其亦可慨也已銘曰
九輓莫前一擠而顛其曷為然退處而年迨天之施公
尚何怨

廣東按察使趙君墓誌銘

成化辛丑春禮部會試天下士吳江趙君栗夫名在第三刻其程文傳播中外名聲大起時年甫二十餘尋登進士上第授刑部主事歷員外郎郎中浙江按察司副使進廣東按察使莅任甫越月卒年四十有九君諱寬栗夫字生而白皙纖弱若不勝衣而警敏絕人自少讀書五行俱下其於舉業若不經意下筆即超邁老輩皆推服之及有官益肆力學問自經史以及諸子百家無不淹貫為文雄渾秀整行草亦清潤時刑曹同官華亭

陳一夔崑山秦廷贊天台王存敬皆能詩四人相得驩
甚更相唱和時吳文定公在翰林良辰佳節四人輒相
過從予時亦往來公所多相賡和君才尤瞻下筆數百
言衆皆驚其捷服其工吏事初非所長在刑曹久律例
通究曉折訟至立解獄無冤滯及董涖江學政能推所
學以變其習士無謏聞狹見之陋凡經指授為文皆有
程度不以權勢動搖有所軒輊高下遇人坦率不事表
襮人以是愛而重之曾祖諱銘黃巖典史祖諱瑛湖州

梅溪局大使考賜累封刑部郎中母沈氏封宜人梅溪
善星數君之幼也以為必貴特愛之南京國子學正莫
君亦奇之歸以其女子男二禧邑庠生餘幼禧卜以正
德元年葬君於吳橫山靈石峯之麓莫宜人祔銘曰
孔翠祥鵠其文既騫騏驎服轅中道忽踈始誰啓之卒
誰尼之已乎栗夫愛莫起之

雲南按察使進階中奉大夫張公墓誌銘

雲南按察司按察使張公諱翥字汝振世為蘇之長洲

人曾祖諱進淞江諸暨知縣祖諱滄國初以人才徵未
用卒考諱樞贈奉政大夫南京刑部郎中妣陸氏封太
宜人公登順天丁丑進士授工部都水司主事改虞衡
司又改南京刑部山東司歷員外郎郎中出知江西南
昌府進河南布政司治叅政雲南按察使致仕以子約
貴進階正議大夫勲資治尹今上登極以詔恩進中奉
大夫正德丙寅冬十月二十九日卒於家春秋七十有
七明年五月己未葬邑之金芝嶺配吳氏累封淑人子

男二長約工部營繕司郎中次蒙貞女三壻為南京太常寺典簿郭忱鄉貢進士顏祿府學生傅義孫男女各四公清慎守法臞然若不自持而見義卓然不惑始至南昌即理冤獄出之民大悅高安有毛姓世豪於鄉縱火殺人亡命吏不敢問公發之竟置重典民又大悚有中貴乘傳搜括民間奇玩勢張甚郡縣望風迎拜且以鹽抑配於民而以庫銀給之至南昌公曰民吾民也庫朝廷之庫也誰敢干之吾將以聞於上中貴見公不可

奪乃稍自戢時所至民被其擾獨南昌晏然雲南諸夷
爭襲賄賂公行公一切禁絕年甫六十以母老懇乞致
仕以歸公天性簡儉家固富且貴矣而自奉有人所不
能堪歸吳掃軌閉門客至則清話終日澹如也居官所
至能舉其職而南昌之政尤偉故予特詳焉銘曰

張公竭竭所至則發昔在南昌或獬而猖肆螫吾民乃
以身當位方日融脩解而旋有子而才有孫有年寵秩
有加亦又何嗟

通議大夫南京都察院左副都御史陳公墓誌

銘

弘治乙丑冬南京都察院左副都御史陳公致仕歸吳
明年正德元年九月十日卒於家又明年其子鑑來京
因請予誌其墓於戲往年吳文定公不祿今茲公又逝
平生交遊存者其幾其尚忍銘之耶其尚忍不銘耶公
諱璫字玉汝世家長洲之陳湖大父諱子富考諱孟善
皆贈通議大夫南京都察院左副都御史祖妣吳氏母

錢氏累贈淑人公積官自翰林庶吉士授兵科給事中
歷刑科左給事中大理寺左右寺丞左右少卿南京都
察院左僉都御史左副都御史階通議大夫嘗以給事
閱實湖貴邊儲以少卿出按湖藩刑獄以都御史檢周
府莊田又按吉府獄事前後董舟師於江上享年六十
有七墓在隆池山之原葬之日為丁卯歲十二月三日
配嚴氏封淑人子男四鎡鑰鍵鏐女二孫八濤淳津沆
漢泓洵汭曾孫四公體貌修整不類吳產少入郡庠已

頎然出其輩類成化戊子占應天解額戊戌今少卿李
公同考會試得其文知其為奇士也置之高等遂被選
為庶吉士時文定公在翰林聲稱藉甚公初與同席硯
遂屈已師之相與廟切為古文詞公質若重遲而思致
獨遠不肯為尋常熟爛語始務奇倔卒造平澹時輩推
之為言官隨事獻納務持大體不沽激訐名妖僧繼曉
事覺法司當以常刑公言先王之制為奇技淫巧以蕩
上心者殺法司當非是於是曉竟坐棄市尚書何喬新

等皆被詰責待罪有中官搏近臣於殿陛間公劾之兩
皆坐黜又劾寧陽侯陳輔諸不法事卒奪其爵在大理
以儒術飾吏事平反唯允初周府莊田與民田相淆累
歲爭不決時河南諸當道意在民也公往履畝其實以
聞詔歸之府於是始忤當道意其董舟師也適劇賊施
天泰出沒海上大肆掠東南騷動公引兵會魏都御
史紳於海口賊已斂氣仍諭以朝廷威信向背禍福賊
遂挺身來歸東南晏然衆方多其功久之海上餘孽復

相煽動言者乃咎公與魏不當受其降會今上初言路
大開言者紛然猶尚以當道故也公不辯遂引疾乞致
仕詔許馳傳以歸明年即其家賜緋袍白金以平賊功
云於戲公之撿田也所持者衷其受降也所存者信而
每不為議者所與夫衷與信非所獲罪也公又何慊乎
其亦命而已矣於人何尤焉銘曰

誰謂吳遠而多文學公在諫垣其儀濯濯乃平邦刑乃
持邦憲出入踐更吏以儒緣世方疾驅吾獨委蛇吾自

吾信曉曉則那退處而休孰怨以尤琢詞立石以昭於幽

封孺人徐氏墓誌銘

孺人徐姓裔出吳之天平山成化中長鄉之稅邑大夫
禮焉一邑之事多倚以集諱熿者其考也水東之陳封
文林郎翰林院編修名輿者其歸也登丙辰進士被選
入翰林為庶吉士授編修侍今上經筵為講官修先皇
帝實錄充纂修曰霽入粟於官授冠帶曰震授八品散

官曰雲為邑庠生曰雷其子也適遠述遂其孫也正統
壬戌八月四日其生正德三年五月八日其卒之日也
胥臺山之青銅塢其葬之地戊辰十月葬之日也天性
貞靜而明慧讀書通大義知楷法事舅姑以恪慎凡烹
調級級澣濯率躬為之不以委人歸陳值家中微尺累
寸積遂大其家甲於一方課諸子以學口授孝經唐詩
指解字義敷說故事使知所慕法霽入翰林之三年則
拜孺人封號冠帔朱袍居常罕御蓋以布素終身焉其

行也是其可書者矣齊方以文學嚮用於時所以褒顯其親將又有異等焉銘曰

詩詠葛覃服乃無斃鴈鳩均平唯內之則于嗟孺人天
平之華來嬪湖汭亦大其家勤而後安母有多子象服
在躬承祀有煒胡不百年享此繁祉刻銘幽宮以永厥
終

震澤集卷二十八